



र 5/

तुबारि

www.pangi.in

अब अंग्रेजी, हिन्दी त
पंगवाड़ी भाषा अन्तर असी।

Issue 088; Aug. 2019

बिषय सूची

यक जिम्मदारे दुख	1
15 अगुस्त	2
सोबी केई असु किछ देण जे	3
तुं जमुण कोई गलती ना भो	3
लखे टके बोक	4
चुटकुले	4

यक जिम्मदारे दुख

यक जिम्मदार शहर केआं दूर अपु गां बिशताथ। तेस जिम्मदारे गी कैसे चीजी कमि ना थी। पर फिर बि से जिम्मदार खुश नोथ। तेस ई लगतुथ कि से गां यक जंगल भो, त से तथ अन्तर अकेला असा। यक रोज तेन सोचु कि अउं अपु गां गी बेची कइ शहर अन्तर यक अब्बल मकान खरीदता।



यक रोज तेन अपु यक दोस्त शहर केआं भिआ, जे शहर अन्तर बोडा अफसर थिआ। जिम्मदारे तेस जे बोलु, मैं इस गी बेचाई कइ त शहर अन्तर मेन्धे यक मकान खरीदाई दे। तसे दोस्ते तेस केआं पुछु, “भाई तु अपु पितरी के अतो अब्बल गी किस बेचण चहांता?

कोई दिक्कत असी ना? रुपई के जरूरत असी त मोउं जे बोल।” जिम्मदारे अपु दोस्ते बोक शुण कई बोलु, “मैं गी शहर केआं दूर असू। इठि शहरे ई पक्की बथ नेई। सोब बथ उनी-खड़ी असी। इ दरिउ जेस अन्तर मेघे पुओणी भरींतु, एस पार कर कइ शहर जे घेण एन्तु। इठि अतो सुआ बुटे असे कि जपल ब्यार लगती त गी अन्तर पन्नी बाई भारी भोई घेन्ते। इन्हि फाटी हेर! हियुंत एन्हि पुठ डंग शी घेन्ता, त तसे बेलि सुआ ओखु भुन्तु। त बोल अउं कीं बिश सकता, इस गी अन्तर?” तसे दोस्ते बोलु “ठीक असु। अउं झठ तें गी बेचाई छता।” इ बोल कइ से घेई गा।




हेउस भ्यागे से जिम्मदार अखबार पढ़ण लगो थिआ। अखबार पढ़ते पढ़ते तसे नजर तेस पुठ गई, जेठि लिखो थिउ, “शहरे शोर-शराबे केआं दूर, चोहरो कनारा फाटी के बुच, ताजी ताजी ब्यारी बई भरिए यक अब्बल मकान अन्तर बसाए अपु सुपने गी। गी खरीदण जे 8888888888 पुठ फोन करे।” जिम्मदारे तेस गी बारे सोच कइ, अब्बल लगु त तेन तेस गी खरीदणे मन बड़ाई छड़ा। जपल तेन तेस नम्बर पुठ फोन किआ, त हैरान भोई गा कि ए त तसेरी गीहे बारे लिखो असु। अब से समझ गा, कि से त पेहलाई केआं अपु मन पसन्दी गां त गी अन्तर बिशो असा। त अब से सुआ खुश थिआ। तेन झठ अपु दोस्ते जे फोन किआ, त घर बेचण जे ना कई छड़ा।

ईहांणि हैं बुछ बि केहि मेहणु एस जिम्मदारे ई असे, जेन्हि अपु जिन्दगी केआं सुआ शिकायती असी। अस सोचते कि हैं जिन्दगी सोबी केआं ज्यादा खराब असी, त सोबी केआं ज्यादा दुख असे।

अगस्त महने तिहार त होरे दन

15 अगस्त आजादी
17 नेधोई धेनीस
24 जल्माशती



धाणि त तसे जुएली
केआं अब सते बंटी
अठ फेरे लवाण



चाहिए। सत फेरे तेके व्याहे,
आठु जे फेरा असा, से कुई जे
लवाण चाहिए कि से कुई बचान्ते
त तेस पढ़ान्ते।

तुबारि पत्रिके अन्तर छपो सोबी लेख, त कथा अन्तर भुओ विचार सिर्फ लेखके भो। तुबारि पत्रिके एसे कोई जिम्मेबारी नेई। तुबारि पत्रिका सिर्फ भाषा सुहलियत करण जे एक मंच देण लगो असी।

हैं पता:

तुबारि पत्रिका; हरी जेनराल स्टोर,
किलाड बजार, त: पांगी घाटि
जिला: चंबा, 176323



ए 15 अगुस्ता, में दादु त दादि चेतान्ता तु, अत्याचारी बिलायीती बाबु के,
यक भुन्जो त लाचार देशी के, डरो त ढनो जिन्दगी मेहणु के
गुलामी पठ पहाड़ पिहो उम्मीदी के।



ए 15 अगुस्ता, में ईया त बोउ चेतान्ता तु,
शहीद भगत सिंहे, जयी राजगुरे त रानी लक्षीबाई के,
जेन्हि अपु जान भक्त चढो थी, चुकाण जे मुल हैं अजादी के,
बापुजी बोलु 'बखरेण लौता, अगर छुटुण असु, असी अंग्रेजी के चुंगुली के,
सुभाष चन्द्र बोस बोलु 'लौता लेहु, अगर टोडुण असु शंकिड़ गुलामी के',
पर तेन्हि सोबी के चाह थी, हैं अजादी के।




ए 15 अगुस्ता, मोउं चेतान्ता तु, यक त्योहारी के,
जेस मनान्ते ना सिर्फ अस, बल्कि मेहणु पूरे देशी के,
बेशक नेई पता मोउं, की भुन्तिथ भुणे गुलाम अंग्रेजी के,
तोउं बि यक होरी जे बधेए देन्ते अस अजादी के।

ए 15 अगुस्ता, काश अजादी मेतीथ असी गरीबी केआं,
झुठे नेते त कपट जुए भरो देशभक्ति केआं,
भुखमरी, शुखा पडुण त अकाल घेण केआं,
भ्रष्टाचार त सरकारी बाबु के घोपले-घोटाले केआं,
तोउं अस मनाई सकते, ए त्योहार पुरे दिल केआं।



सोबी केई असु किछ देण जे

यक बोडे शोलियार देणेबाड़े बुटे भेएइ यक बोडा शुखो बुटा थिया। शोलियार देणेबाड़े बुटे पुठ भ्यागे ब्यादी सुआ चड़ी चखुर बिशतेथ। केइ चेड़ी चखुरु त घणी शोलियारी बझई जुओई गुल्हे बि बडाई रखो थिए। पर शुके बुटे पुठ न कनि गुल्हे बडाओ थिए, न कोउं बिशताथ। एसे बझई जुओई शुखो बुटे तीं शरम लगतीथ। तेस शुखो बुटे पुठ भ्यागे ब्यादी सद टाई चोउर हड़ानी एई कइ अराम कतीथ।



यक रोज शुखो बुटे शोलियार देणेबाड़े बुटे जे बोलु, भाई तु कतो किसमतबाड़ा त भलु करणेबाड़ा असा। हजारो चेड़ी चखुरु तु आसरा नेते ता तुसी कतो सुख मेती न। शोलियार देणेबाड़े बुटे घमण्ड भुआ। अकइ कइ बोलु भाई ए त अपु अपु किसमत भुओ। शुखो बुटे आश थी कि मेई शोलियार देणेबाड़े बुटे तरीफ कियो असी त जरूर से में बि तरीफ करियाल। पर घमण्डी शोलियार देणेबाड़े नीले बुटे शुखो बुटे तरीफ अन्तर यक बोक बि न बोली। शुखो बुटे दिल टूट गा। सुआ टेम कैआं पता हियुंते महेन एण लगो थिआ। जीं जीं हियुंत ठन्हियार बधती गई शोलियार देणेबाड़े नीले बुटे सोब चेड़ी चखुरु भियागे बियदी बोडे शुखो बुटे पुठ धूप सेकण लगे। अब घणी शोलियारी बाड़े बुटे पुठि रोनक घेई गई। अब सोब चड़ी चखुर सिर्फ रात उघण जे शोलियार देणेबाड़े बुटे पुठ घेन्तेथ।



शोलियार देणेबाड़ा बुटा उदास भोई गा त तेस लगु कि बुटा नीला भोल, या शुखो भोल तसे चड़ी चखुर जुओई हमेशे हमेशे रिश्ता-नाता असा। जीमि पुठ लुंगो हर यक चीजी अपु अपु खासियत असी, बुटा चाहे बोडा भोल या मठइ भोल, शोलियार देणे बाड़ा या बगैर पन्नि भोल। तिहांणि मनखे बि असु, कोई बोडा, कोई मठइ, कोई हेरणे अब्बल त कोई कुस्तुरा। कोई अमीर त कोई गरीब। पर एंके बेलि मनखे खासियत ना बदलती। सोबी मनख अन्तर खासियत असी, होरी देण जे कुछ ना कुछ भलाई असी। असी कोई बि मेहणु घट ना मनण चाहिए, होर ना ता अपफ जे बेकार समझुण चाहिए।



जिम्मदारे दुख बाकी हेस्सा

पर कि तुसी कदी अपु जिन्दगी होरी के नजर जुओई हेरणे कोशिश किओ असी ना? दोस्तो अपु जिन्दगी कदी होरी के नजरी बेलि हेरणे कोशिश करे। तिखेई तुसी पता लगता कि तुं जिन्दगी होरी केआं कति अब्बल असी। तुस होरी केआं कतो सुखी असे।

तुं जमुण कोई गलती न भुओ

यक बड़ाई जुओई तुस से भो,
जे तुस भो

यक मुशिकल उपाये हेस्सा तुस भो
यक किमती, सिध्द त सुआ खास
नमूना तुस भो

परमेश्वरे खास जिल्हाणु मड़द

बोलिंते तुस भुओ

यक बड़ाह बेलि त तुं इस सूरत शकल बि भो



परमपिता परमेश्वरे कोई गलती नेई कियो

तुस असे बड़ाओ तेन ईये पेठ अन्तर,

तुस ठीक तीं असे, जीं चहांताथ से तुसी बणाण।

तुं ई बोउ तेनि चुणो असे,

तुसी चाहे से कीं किस ना लगे,

से परमेश्वरे उपाये हिसाब जौ तेस रुपे बणो असे

त लगे असी तेन्हि पुठ मुहरी प्रभु।

आं, तोउ पुठ आओ से सदमा, ना थिआ सुकता

तुसी जे लगे थी चोट, परमेश्वर बि लगी रोलाण

तुं मन आकार देण जे भुण दुतु इ सोब

ताकि स्वरुप अन्तर तसे, अगर बध सकियल तुस

यक बड़ाई जुओई तुस से भो, जे तुस भो

प्रभु हतेउ बेलि बड़ाओ असे तुस


ट्यारियो, तुस से भो, जे तुस भो

किस कि परमपिता परमेश्वर,

सोब किछ जुदारणे बाड़ा, तुं सृष्टिकर्ता भो!

लाखे टके बोक

हैं पांगेई सोबी रोड़ि कोठि ना
कोठि बोड़ त लगारे असे। कुछ मेहणु
जे कि केसेरी इज्जत ना कते किस
कि। मेई यक, दुई बोड़ ईं काए कि
तेन्हि बोड़ि बठ ईं ऊलटु सुधु मथलब
बणाई छओ असा कि से कदी तेन बते बड़ ना हंटते, ना
अपु मां,भंण जोई कि तेस बोड़ हेर कइ शर्म ना भुंती
ना। कि तुस न चहांते ना कि हैं इस पांगेईं पूरे मतोक
अन्तर नोऊ रोशन भो लोतु? कि बाहरी मेहणु इस भूमि
बठ ए त बोलियेल कि इठि सोब धेर साफ सुथुरु असु,
त इठियांकण मेहणु ती भलमास असे।



तुबारि मासिक पत्रिका

◆अस इ उम्मिद करूं लगे असे कि एण बाड़े रोज अन्तर सुआ मेहणु इस कम अन्तर साथोट देन्ते।

◆इस तुबारि मासिक पत्रिका समाचार पत्र एकट अन्तर रिजिट्रि नेई भो। सिर्फ पांगी घाटि अन्तर पदुं जे त भाषाई सुहलियत करण जे इ पत्रिका शुरु किओ असी।

◆तुबारि यक अवाणिज्यिक पत्रिका भो।

◆तुबारि पत्रिका कोई मेहणु, जनजाति, त संस्कृति गलती कदण जे नेई छपाण लगे। अगर कोई ईं सोचता बि त अस जिम्मेबार नेई।

◆छपाणे पेहे सोभ आर्टिकल दुई टाई पांगेई मेहणु हरालो असे। इ त खुली बोक असी कि पेहलि बार पांगवाडि लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।

◆आर्टिकल्स ना मिलल, या घाटि मेहणु के साथोट ना मिलल त तुबारि पत्रिका कदी बि बंद भुई सकती।

◆कोई चीज छपां असी या नेई छपां जे तुबारि संपादकीय टीम पुरा अधिकार असा।

◆अस किलाड केन्द्रीय पुस्तकालय, त बजार हरिराम लाले दुकान अन्तर तुबारि ड्रॉप बॉक्स पुठ बि अपुं सझाव ओर आर्टिकल्स रखुं जे सुविधा किओ असी।

◆अस सोबी पांगी मेहणु जे हात जोड़ कइ अनुरोध कते कि, तुस बि कोई अच्छा आर्टिकल, पुराणि या नोई कथा, कहावत, कविता, त नोई घीत (पागवाड़ी अन्तर) लिख कइ छपां जे हेंघे दिए।

तुबारि संपादकीय टीम

☎ 9418429574

☎ 9418329200

☎ 9418411199

☎ 9418904168

☎ 9459828290



चुटकले

- यक मेहणु बस अन्तर दुई टिकट नी। कनेक्टर: दुई किस? मेहणु: यक फटेई गई त दोकी रेहंती। कनेक्टर: अगर दोकी बि फटेई गई त? मेहणु: त पास कपल कम एन्ता।

- यक मेहणु दुकानदार जे: यक किलो दूध दे। दुकानदार: पर तें भान्न त सुआ मठुड असु। मेहणु: ठीक असु त फि बकरी दूध दे।

- कुआ ईया जे: ईया, दूध पीता। ई: दूध फट गऊ। कुआ: ईया, दूध सनाड़ी त धागे बड़ स्यण दे।

